



東華續錄

光緒九十五

臣朱壽朋敬編

臣汪錫增恭校

六月丙子諭雲貴總督岑毓英秉性公忠才識沈毅由諸生從事戎行咸豐同治年間雲南回匪倡亂兵事孔殷仰荷 先朝特達之知迭加超擢代理雲南藩司旋即簡授巡撫當兵單餉絀之時激厲衆心出奇制勝克復省城肅清大理等府掃穴擒渠全滇底定厥功甚偉迭經賞給騎都尉並改爲一等輕車都尉世職朕御極後擢任雲貴總督整頓地方操練營伍均能實心任事光緒九年統兵出關卓著勞勩復加賞一等雲騎尉世職該督久居邊陲染瘴成疾上年查閱營伍途次觸發舊病迭次請假調理本年四月力疾銷假方冀醫治就痊長資倚畀遽聞溘逝軫惜殊深岑毓英著加恩晉贈太子太傅入祀昭忠祠並於雲南建立專祠生平政蹟事實付國史館立傳賞銀一千兩治喪由雲南藩庫給發照總督例賜恤任內一切處分悉予開復應得卹典該衙門察例具奏靈柩回籍時沿途地方官妥爲照料伊子遇缺卽補道岑春榮著俟有道員缺出請旨簡放候選同知岑春煦著以知府應升之缺升用前工部郎中岑春炳著以五品京堂候補監生岑春萱著俟服闋後由吏部帶領引見岑春蔭並伊孫岑德純均著俟及

歲時帶領引見用示篤念盡臣至意○楊昌濬劉錦棠魏光燾奏臣等承准軍機大臣字寄光緒十五年正月三十日奉 上諭色楞額等奏伊犁塔達居邊要巡撫礙難遙制擬將地方文武仍歸將軍副都統就近專轄一摺等因臣等竊維自古有治人無治法而擇人以使權在 朝廷非臣下所敢私議臣錦棠是以於本年二月初二日具奏請 旨定奪比奉 批旨仍令會同議覆仰見 聖慮周詳慎重邊防之至意臣等何敢引嫌自避終默不言伏查色楞額等所奏各節自係爲邊防緊要起見伊犁塔爾巴哈臺本皆新疆境地昔年屯兵制守則南北各有不同今既建省設官則伊犁塔爾巴哈臺必須聯爲一氣而巡撫統轄全境尤應併計兼籌若以伊犁一隅之地畫疆而理不特事涉紛歧且恐形勢扞格貽誤必多前此部議伊犁將軍改爲駐防旋卽奏准裁參贊設副都統以改照駐防之制是體制業經奏定誠如 聖諭一切官制營制甫經議定未便遽行更張也況前奏聲明將軍節制鎮道較之內地駐防其分更崇其權亦重何必再行改易至原奏內稱伊犁距省太遠巡撫礙難遙制查南路之阿克蘇道距省二千餘里遠於伊犁約將一倍喀什噶爾道距省四千餘里遠於伊犁約且數倍伊犁距省不過一千四百餘里已難遙制然則南路兩道所屬又將如何且塔爾巴哈臺之距伊犁與伊犁之距省城正相等耳將軍能制塔爾巴哈臺之地豈巡撫獨不能制伊犁之地原奏又稱塔爾巴哈臺遇有要務及地方重大

事件卽由副都統隨時辦理一面咨明將軍酌核其倉庫之盈絀驛傳之遲速文武官吏之賢不肖均由副都統就近考核進退若命盜案件仍歸伊塔道核轉等語於體制亦多不合惟原奏請於漢隊分撥一千五百人倣成都將軍之例設立軍標一節_臣等查將軍副都統設立軍標營制藉壯聲威自應照辦擬請於伊犁原定漢隊四千人之內分撥一千人隸之將軍餘悉隸之鎮標塔爾巴哈臺原定漢隊二千人之內分撥五百人隸之副都統餘悉隸之協標於兵數餉數並無增加除旗營及蒙哈藩部喇嘛等事並交涉事宜必須隨時決制者統歸將軍辦理其伊犁塔爾巴哈臺等處地方文武均請歸新疆巡撫管轄仍照前奏由伊犁將軍節制鎮道如蒙 俞允其一切應辦事宜容_臣等詳晰會商另行奏明辦理得

旨如所請行○諭步軍統領衙門奏拿獲盜犯先行覆奏一摺五月初二日廣安門外松壽當舖被盜搶劫右營遊擊鵬展等登時往捕該匪膽敢放鎗抗拒當經該遊擊等追獲盜匪一名並現贓多件緝捕尙屬出力所有已獲之盜犯張三交刑部嚴行審訊按律懲辦仍嚴飭該員弁等將在逃之張皮慶等迅卽嚴拿務獲審辦毋任漏網遊擊鵬展守備石俊興著俟逸犯就獲後准其從優保獎○丁丑以王文韶爲雲貴總督○調蒯德鏞爲福建臺灣布政使以鄧華熙爲湖北布政使岑毓禧爲雲南按察使○以邵友濂爲湖南巡撫○戊寅以徐致祥爲都察院左副都御史○壬午予怡親王載敦續假三月○癸未上

詣 奉先殿 壽皇殿行禮○甲申命額勒和布李鴻藻爲承修太和門工程大臣○劉銘傳奏臣前准部覆臺灣要缺知縣一項暫准不論資格一體酌量請補俟三年期滿仍照定例辦理新設知縣各缺先准酌量補署一次其變通章程行令察看定限奏明等因查臺灣際此行省初設事事創始因地擇人藉收指臂之助實爲目前第一要義誠恐格於定例棄置人材此臣所以前有變通之請舊設知縣要缺既准部議變通補署三年屆時能否仍循定例應否再展自當再行察酌惟新設各缺茲覆加察看不特當之草創經營猝難就理況多地居新闢番界煙瘴尤重人地既貴相宜變通期限似不能不酌量從寬應仍照前議以十年爲限俾資治理再現在臺地各項差事在在需人一俟變通限滿而此項在臺灣委用人員永無補期似不足以昭平允所有中簡廳縣及佐雜各缺可否仿照一咨一留章程在內地調補一次就臺差委各項班次人員請補一次以示鼓勵下吏部議奏○張煦奏查陝省營田係同治初年逆回叛產照例入官同治四年設局清查招墾共計荒地四千一百二十七畝原定章程平原旱地額租上則每畝三石中則二石下則一石五斗俟額租交足發給執照地歸佃戶管業計有營田二十五州縣長安一縣內有水田准按上則完納向來大荔縣另有沙地議定上則每畝完租銀五錢中則四錢下則三錢租清並准撥地給照旱地應交租課無論小麥粟穀三項悉聽民便交納自同治四年設局起至

光緒六年夏季止共墾荒地三千四百頃零四十餘畝佃戶應交租糧均未足額前撫臣馮譽驥查明佃戶交租有運裁耗餘等費未墾荒地多屬礪礪之區貧民不願領種酌改舊章將未墾旱地額租上則減爲二石中則一石三斗下則一石同已墾熟地併准折錢交納每京斗租麥一斗折收銅錢一百文大米一斗折收銅錢一百五十文維時清查原報未墾及已佃續荒各地尙存八百八十頃五十五畝通飭各屬遵章試辦迨光緒十年接奉部議另再妥籌整頓前撫臣邊寶泉復將章程釐定議請將各屬未墾荒地上則額租減爲一石五斗中則一石下則七斗五升俟三年後再行起租均經先後奏明奉旨允准欽遵在案臣自去歲十一月到任詳查各屬未墾荒地尙存五百三十頃有零應交熟地租課短欠尙多據咸甯高陵咸陽渭南涇陽臨潼等屬佃民迭以招墾民荒地畝屆限升科不納租課營田水旱各地均須分別等則交租折價呈繳計自領墾至今凡膏腴上中等地及有力佃民應交租糧均早交足換照現在短欠額租暨未墾荒地半皆赤貧佃戶及沙石夾雜下業懇請豁免租課一律發照遵限輸納正賦等情聯名再三稟懇臣以民荒本屬民業招民墾種自無由官收租之理營田係入官叛產定章交租管業蓋默寓變價之例於其中雖兩相比較不無苦樂之分而叛產與民荒原自不同究難以彼例此惟念秦中兵旱頻仍元氣未復農民終歲勤動完納正賦之外兼納租課民力不逮亦屬實情當經批飭善後局

營田所斟酌情形核議去後茲據善後局司道會詳稱查各屬原報營田計至十三年報銷止共已開墾地三千五百二十餘頃劃除高陵華州被水衝刷地一十一頃有零通計各屬已墾而交足額租給照管業有一千六百九十餘頃各屬已墾熟地應完額租歷年已交各色糧租並折價易銀撥解司庫均已分別支用存儲按年造報現在民欠租數除十四年續徵之數不計外共實欠京斗麥十八萬二百餘石長安縣另欠白米一百三十餘石大荔縣另欠沙租銀五千八百四十餘兩核計欠數均屬過鉅近年來嚴飭各州縣遵章催比完納總欠踴躍竊思完租即可撥地永爲己業該佃戶自非有意拖延祇緣民力拮据額租與正糧並納兼顧維艱體察民情不無可憫第自定章以來綜核各屬交過京斗租糧計已二十萬一千餘石折錢易銀共收十七萬餘兩今若竟將未交額糧全行豁免則前後辦理兩歧無以服已交額租佃戶之心如仍照舊徵收而追呼罔應又無以紓現在窮民之力再四籌商惟有酌量核減以示體恤擬請自本年爲始所有已墾尚未給照管業各則地畝應交租糧查明領地先後歷年議定租數分別按糧折價悉照前定章程酌減三成小麥每京斗一斗折收銅錢七十文白米每京斗一斗收銅錢一百零五文現在未墾荒地截至本年春季底止僅存三百五十餘頃皆屬極下之業近年設法招徠無人認墾擬請將應交額租再行酌減上則每畝完租一石中則六斗七升下則五斗仍俟三年後再行起租折

價卽照現定之數一律辦理大荔沙地租銀前經兩次減租均未議及擬請將已墾尚未交足各則沙地按照原章酌減三成每銀一兩祇收七錢尙未招墾沙地一百七十餘頃與未墾旱地事同一律併請量爲議減上則每畝完租銀四錢中則三錢二分下則二錢四分亦俟三年後起租將來徵收時仍照現定核減之章程每兩祇收七錢以免參差如此酌量變通既可少紓佃力亦不致有礙定章等情由善後局司道會詳前來臣覆查無異謹恭摺具奏下戶部議奏○丙戌諭奕劻等奏遵保神機營備操各員並該營管帶官暨海軍內外學堂出力人員各摺片副都統銜營總國勝著以副都統記名坐補浙江鹽運使惠年著不必坐補仍以鹽運使用已革庫倫辦事大臣桂祥陝西鹽法道常瑛均著開復原銜翎頂桂祥並著賞給頭等侍衛常瑛並著以知府記名其單開之芬車等均著照所請獎勵餘依議○諭奕劻等奏各省關應解海防經費期滿請分別勸懲開單呈覽一摺據稱各省關應解上年海防經費及解補歷年欠款有掃數全解者有尙未解清者自應查照定章分別勸懲所有業經解清之湖北省及閩海鎮海江漢蕪湖粵海各省關著交部查取職名給予議敘全未補解之江蘇江甯浙江江西等省著查取職名議處此項經費關係緊要卽著該督撫飭司將銀兩迅卽如數撥解毋再遲延致誤要需嗣後各省關務當遵照指定數目按年解清不得任意宕延餘依議該部知道○戊子予故道員吳毓蘭於揚州建祠列入

祀典○己丑李鴻章奏光緒十四年十月接准庫倫辦事大臣安德咨開庫倫地方邊關劫案頻仍奏請飭調宣化練軍前營馬隊由臺站前往駐防以資鎮懾奉 硃批著照所請該衙門知道欽此恭錄知照前來臣當飭宣化鎮總兵王可陞籌議該軍前營馬隊自光緒十二年由庫倫撤回即移紮口外多倫諾爾迤北經棚一帶緝捕盜賊保衛商民安德來咨正值口外冬防喫緊勢難遽行遠調且臺站水凍草枯沿途應需駝隻能否照數供應該官兵應需加餉等項如何籌備亦須妥細查核方可酌定行期即經咨行察哈爾都統托倫布咨開臺站苦累額駝不敷供差此次宣化練軍出邊須另僱駝隻租賃氈房購備糞薪請於該衙門截賸茶馬釐捐項下撥銀濟用奏奉 諭旨允准咨請飭調並據練餉局司道查照前調練軍赴庫倫設防定章詳請具奏各等因臣查該軍前營馬隊計營官幫辦哨隊官什長正兵親兵伙夫馬夫加夫共合三百五十六員名應分作十起行走以紓臺力每起派官一員勻帶兵夫三十五名需騎駝三十六隻另備運載行糧鍋具軍裝火藥等駝十五隻又氈房一項糞薪足用該官兵長驅沙漠遠戍邊荒其形艱苦自應照案核加餉項俾示體恤除原領薪費餉乾由練餉局循舊籌撥外按出征章程計兵丁二百五十名每名應加月餉扣建二錢每年合銀六百兩又加夫四十名每名支扣建銀三兩每年銀一千四百四十兩又照舊章全營月支不扣建柴草銀八十兩每年合銀九百六十兩又另案加增

柴草自十月至四月每月不扣建銀五十兩七箇月合銀三百五十兩又兵丁每名應給皮衣銀二兩五錢共合銀六百二十五兩連馬棚帳房等項均由局設法籌撥又兵丁伙夫馬夫加夫共三百四十三名應照光緒六年奏定章程由部庫每名按月撥給辦運米糧各費扣建銀一兩五錢每年合銀六千一百七十四兩仍由練餉局按年赴部預領轉發應用現據該局將夏秋兩季餉項挪措給發其應加各款自五月分起支並據該鎮王可陞先行借款購辦粟米筱麵及口袋繩蓆裝紮完固分僱牛車駝隻取道商路運赴庫倫另由宣化抽派馬隊百名赴經棚一帶接防卽於五月內調前營官兵由經棚回抵宣化趕備行裝軍伙寬帶行糧該營官郭洪保管帶因沿臺乾旱須俟雨降草肥暢行無阻擬六月十六日分起拔赴張家口次第出邊前進仰懇 天恩飭下戶部將該軍辦運米糧各費每年銀六千一百七十四兩先行撥給一年交練餉局委員領回以後再隨時續領俾濟要需至畿防練軍關係緊要未便久役於外應由庫倫自行整頓軍伍俟地面綏靖仍將宣軍撤回藉節經費得 旨如所請行○庚寅諭方汝耆呈遞奏摺將有字舊摺顛倒繕寫非尋常疏忽可比著交部議處○辛卯崑岡等奏查 臣寺額設滿洲署正署丞典簿司庫凡十五缺惟署丞係不分滿洲蒙古按科分名次擬選又查 臣寺例載大官珍饈滿署正二缺係題缺如遇缺出先將一等之滿洲署丞典簿司庫筆帖式擬定正陪出具考語吏部查核與例

相符帶領引 見錄用等語是臣寺題選各缺均無蒙古專缺惟署承由部擬選不分滿洲蒙古是以間有蒙古舉人選授是缺者迨至保列 京察一等遇有署正題缺皆以蒙古署丞例無題升滿洲署正明文礙難保題又查吏部則例內開六部現任蒙古司員曾經保列 京察准作一等者如遇滿洲應題及應行留題之缺准其與滿洲一等人員一體酌量揀選如將該員題補由該堂官奏明指名借題毋庸擬定正陪等語是六部之有蒙古專缺者曾有借題之例今臣寺蒙古司員既無專缺可升雖經保列 京察一等亦無題升之階此項人員未免向隅合無仰懇 聖恩准將臣寺蒙古一等司員比照六部蒙古一等司員之例遇有滿洲署正題缺與臣寺滿洲一等司員一體揀選題升後再經保列 京察一等仍與滿洲人員一體調繁其並非一等人員仍不借升題缺以示限制如此量爲變通則臣寺蒙古司員稍資鼓勵與六部借缺定例亦不致兩歧可否 飭下吏部酌核議奏之處出自 聖主鴻慈 上諭崑岡等奏蒙古一等司員升途較隘請援例接升滿洲題缺一摺著吏部議奏○壬辰徐桐等奏本月十六日據臣院侍講銜編修王懿榮呈稱爲 四庫全書事闕文教請俟方略會典兩書告成後懇 恩特飭續修事竊職伏見乾隆朝 高宗純皇帝 欽定四庫全書分經史子集四目所收書籍上自周秦以迄我朝三千餘年聖作明述之跡粲然大備中間恭載 列聖御製全集 御纂 欽定各書牢籠天地彪

炳古今漢唐以來文章美富未有若斯之盛者也至我 皇上御極之十有五年時經百載開通日廣文物日新厥有市舶泛來前代流傳海外之書又有乾隆以後通材碩學網羅散失採集逸佚復古再成之書說經補史重注重疏精校精勘之書以及天文算學地輿方志政書奏議私家撰著卓然經世之書層見迭出或先得者殘而重收者足或沿稱者僞而改題者真者據一門後來居上藝數之流晚出愈精若此之類上溯舊例應行著錄者其爲粹美庶幾前編皆所以導揚盛治恢崇至道千載一時於今爲烈職愚以爲 皇上親裁大政庶事求舊以 聖紹 聖美善畢臻所宜重開新館續纂前書 萬幾清暇藉資 乙覽以今翰林院衙門講讀編檢諸員幾二百人加以後來 恩科選用爲數益夥館閣諸差較之部曹又爲簡易歲糜俸銀季分廩祿仕優則學朝夕論思職亦宜然且近三十年來學術之變亦汲汲矣篤實之風漸微而新學異說紛然競起若不及今整齊百氏失其指歸其爲流弊豈可勝言孔子曰博學於文約之以禮明學術以正之則孟子所謂道揆法守者將在於此此又 皇仁所以繼述 高宗純皇帝之盛心而爲天下治道之大防者也現在方略會典兩館齊開 欽派總裁大臣有日不暇給之勢一俟兩書告成之後可否請 旨飭下掌院學士議定重開 四庫全書館卽院修書不支薪炭不開保獎所修之書一遵前例外省採進分派編校各撰提要總裁閱看每成一類輒呈 御覽應鈔應存恭候

欽定將來 國史諸志亦卽藉此取材俟屆三年掌院學士量其勤惰品其高下以爲考課歸入京察事以煩而不費官以修而無曠蓋厚重少文前史所稱此指其人質性而言未聞有不多識前言往行以蓄其德而能設施爛然足裨實用者造就人材亦在於此惟次第取辦從容就理不涉鋪張自歸實際凡事皆然矧在政體職固不敢造次請 命而致昧於先務之急也冒瀆陳詞誠惶誠恐謹請代奏伏乞 皇上聖鑒等語 臣公同閣看尙無違悖字句不敢竊於 上聞理合據呈代奏伏乞 聖鑒又奏本月十六日據 臣院編修王懿榮呈稱爲臚陳 本朝儒臣所撰十三經疏義請 賜取列學官以光文治事竊維經者徑也易書詩禮春秋昌明博大如日月之周乎天注猶瀉也毛鄭何趙杜范廣達疏通如江河之行乎地皆所以綱紀人倫維持風俗異教入而卽湮邪說來而遂化遭時制宜其用無窮是以漢崇師法十四博士並置學官隋錄名家五千餘卷同修甲部唐孔穎達奉勅首編正義宋邢昺受詔兼疏眾經斯誠前代之隆規先儒之盛業甄陶六合整齊百家我 聖朝之有天下也聲教覃敷敦崇經術 列聖建極御纂尤繁稽古同天啟兩大精微之蘊觀文成化定四方億兆之心昭雲漢而爲章牖黔黎以上道上行下效經正民興職伏見自乾隆以來至於今日海內經學各有專家剖析條流發起隱漏十三經說聚然將備折衷求是遠邁漢唐時則有若湖北安陸儒 臣李道平所撰周易集解纂疏江蘇陽湖儒 臣孫星

衍所撰尙書今古文注疏長洲儒臣陳奐毛詩傳疏安徽績溪儒臣胡培壺所撰儀禮正義江蘇句容儒臣陳立所撰春秋公羊傳正義浙江嘉善儒臣鍾文蒸所撰穀梁經傳補注江蘇寶應儒臣劉寶楠所撰論語正義儀徵儒臣阮福所撰孝經義疏補注山東棲霞儒臣郝懿行所撰爾雅義疏其他經說以博通見長不屬疏義者不在此列所有各書或經進御覽或流布學校可否請旨飭下各直省督撫於各該員原籍所在卽家徵取定本分咨各直省有書局之處詳細校勘刊刻成函將板片彙送國子監衙門存儲以便陸續刷印頒行直省各學嘉興士林俾資講習元建康道編牒九路鐫全史而命校官宋撫州庫廢冊千箱墨羣書以給多士從此膠庠引重祿金貨漆字之私將來華裔流傳識虎觀鴻都之大國之庶美士之英華何以逾此惟大小戴雜四代之文因革殊制左邱明綜五方之史聞見異詞以較他經本爲繁重寶應儒臣劉文淇撰左氏傳正義業專一家事歷三世行將寫定至周禮禮記二書疏義風聞江浙兩省承學之士方事潛研尙屬草稿一俟異日之書嗣出並令各省學臣隨時疏報由國子監官公同審詳與各前書義出一律查照現案請旨施行職竊以疏家之義志在輔注所從之注詣在善經往往衆說紛斥一師墨守侈主奴之迭見任得失之並生然家法嚴而後古義堅門徑清而後學派正其能久遠亦在於斯惟期諸臣學識兼長野言既刪僞傳復黜見以博而理愈通知以真而用彌切雖集思廣

益倚撫有待於後人而抱闕守殘援據已賅夫先哲至如戴德纂記爰及漢昭比於羣經自爲屢難然劉向目錄業入經篇宋代儒家已稱顯立則有山東曲阜儒臣孔廣森所撰大戴禮記補注援據精深訂盧辨之佚文續康成之緒說所當翼附尾隨如驂之靳又如漢許慎說文一書存六書之規矚爲羣經之階梯有江蘇金壇儒臣段玉裁所撰說文解字段氏注山東安邱儒臣王筠所撰說文句讀釋例最爲賅治譬之杜林訓纂之作入藝略以兼存元度字樣之書儼石經而並立相應請旨一併飭各該省由印書局刊送國子監此次各經注後依類印行使我朝諸儒所纂經學小學之書頻水辟雍粹然並陳一臻盛美職竊伏念魏晉而後易無完注書無完經真贋相參奪僞踵起中更荒廢如確秦燔千百僂言無關閔旨不遇我朝君臣同德千載一時握璣鏡以式九圍運斗樞而敷五教何以索隱鉤深精窮奧業存真裁僞渙雪前修大義乖而復昌微言絕而重續符三代同風之盛成儒者逢辰之期迺知神聖化光等百王而立教風雅道著合四海以來同作述之美旣彰太平之望允塞職爲闡揚文治起見謹請代奏伏乞皇上聖鑒等語臣等公同閱看尙無違悖字句不敢壅於上聞理合據呈代奏上諭翰林院編修王懿榮呈請續修四庫全書並臚陳本朝儒臣所撰十三經疏義請飭取列學官各一摺著俟會典纂輯告成後由翰林院奏明請旨○甲午張曜奏彙保修培堤埝出力人員分別異常尋常勞績懇請給

獎下部議奏○張之洞奏惠潮兩府嘉應州等地方被水賑撫情形得旨卽著飭屬妥爲賑撫毋任災

民失所○張之洞奏上年冬間經臣疊次檄飭東西北三江凡有圍基各縣急趁冬晴水涸於向來單薄

去年被水處所修築完固並派員會同各屬文武員弁督率紳士籌撥經費倡率民捐妥速辦理務於春

水未至之前一律竣事復於本年春間籌款委員豫買應用木椿竹纜等項分儲水道堤隄各縣以備緩

急四月中旬省城連日大雨各路漸次加漲臣慮新築沙土未實卽於是月二十一日乘坐小輪出省親

往覆勘督催先溯北江仍由北江還省中途由青政口入閩四會之綏江由新興江口入閩肇慶府城外

之支河由三水口入閩高明之支河由官山海口入閩南海之支河所有三水四會高要高明鶴山南海

各縣各大圍晝夜奔馳詳加查勘凡沿江暨沿河小輪可通之重要各處均登岸步行察看此外沿岸各

圍舟行可觀培築尙屬認真卽於二十六日回省現在各圍內禾苗長發彌望青葱續據四會縣稟報四

月底晝夜大雨五月初一日該縣上游廣西懷集縣暴漲驟下水長一丈有餘幸各圍基略有坍塌處所

均經竭力保護無虞於初三日後水勢漸卽消退若此後晴雨應時夏漲平緩西北兩江各郡縣或可無

意外之慮臣仍分飭員弁督率慎防以免疏虞報聞○乙未予錫珍病假一月○正白旗領侍衛內大臣

正黃旗滿洲都統固倫額駙公景壽卒派載澤前往奠醊卹蔭如例並賞銀二千兩治喪○丁酉命奕謨

爲閩兵大臣○命奕劻管理上虞備用處事務○命伯彥訥謨祜管理圓明園八旗包衣官兵並管理烏鎗營事務○命本格爲管理行營事務大臣○命晉祺管理善撲營事務○戊戌命晉祺管理奉宸苑事務○以載漪爲正白旗領侍衛內大臣調世鐸爲正黃旗滿洲都統福錕爲鑲紅旗滿洲都統以熙敬爲漢軍都統○調希朗阿爲正藍旗滿洲副都統以恩全爲正黃旗漢軍副都統○己亥轉續昌爲戶部左侍郎調崇禮爲戶部右侍郎以巴克坦布爲兵部右侍郎○額爾慶額奏查塔爾巴哈臺防營業經添補足額改設步隊三營馬隊四旗共員弁勇丁一千九百九十八員名一律支領坐糧共計每歲需正餉銀十一萬八千三百一十八兩二分其餘一切欸項仍照舊案支發惟各營員弁缺額除原設副將以下等缺三十五員不計外按照甘肅新疆巡撫劉錦棠奏定章程應裁去經制外委四員添設千總二員把總二員蒙古把總二員額外外委三十名合之原設各員缺共六十七員名至各營員弁應領俸廉薪蔬紙張馬乾折色料草等項銀兩照章支領外其公費一項塔城瘠苦情形與新疆南路迥殊自應酌定數目以資辦公擬每歲支給銀二千七百兩俟分防設汛後視道路遠近再行切實估計報部查核著理塔爾巴哈臺屯防營副將白占春稟請具奏等情前來奴才伏查前任參贊大臣錫綸奏設副將以下等三十五員缺係照舊制辦理茲照劉錦棠奏定新章按三營四旗合算所有原設各員缺實屬不敷分布惟有